


PADU DEL CARIBE





PADU DEL CARIBE

ARTISTA MULTIFACETICO

Publicacion na ocasion di su 75 aña

Oranjestad
Biblioteca Nacional Aruba
April 1995

Compilada por Astrid de Cuba y Lilian Semeleer

Copyright © 1995 Biblioteca Nacional Aruba

ISBN 99904-85-08-9

Gradicimento

Nos ta expresa nos gradicimento na tur persona cu den transcurso di tempo a publica algo tocante Padú. E contenido di e publicacion aki pa gran parti ta basa riba nan informacion.

Tambe un gradicimento special ta bay na Padú mes kende a duna Biblioteca Nacional Aruba informacion adicional riba su bida artistico.

Aunque cu e publicacion aki no ta pretende di ta un biografia exhaustivo, e ta un compilacion unico di e bida fructifero di e gran Arubiano y musico Padú Lampe.

Gustave Nouel, conocido pintor Arubiano, a percura pa e diseño di e portada, locual a duna un toque di realce na e obra. Hopi danki pa esaki !

Ademas Biblioteca Nacional Aruba kier expresa su gratitud na Caribbean Mercantile Bank y First National Bank, cu pa medio di nan aporte financiero a yuda realisa e publicacion aki.

Por ultimo un danki grandi na e bibliotecarianan Astrid de Cuba y Lilian Semeleer kendenan a realisa e compilacion aki. Pa loke ta trata e coreccion di Papiamento Biblioteca Nacional ta gradici Ito Tromp.

Biblioteca Nacional Aruba



CONTENIDO

Prologo

Padú, un repaso di su bida	6
Nos Himno "Aruba Dushi Tera"	8
De Trupialen	11
Padú, e compositor	11
Padú, e musico	16
Presentacion na television	20
Padú, e pintor	21
Padú, e escritor	22
Padú, e embahador cultural	24
Reconocemento	25
Bibliografia	28

PROLOGO

Padú del Caribe no ta solamente coautor di nos himno y un artista multifacetico pero tambe un personalidad cu kada Arubiano ta sinti su mes identifica cune pa medio di su musica.

E reconocimiento den nos comunidad pa su persona ta hacie dificil pa scohe un regalo suficiente grandi pa e gran artista aki na ocasion di su 75 aña di bida.

Biblioteca Nacional, sin embargo, pa medio di e publicacion aki kier duna un recuerdo chikito na e gran Arubiano aki.

"Padú, nos ta dedica cu honor e publicacion aki na bo persona den nomber di tur Arubiano, como reconocimiento y aprecio pa bo amor y dedicacion pa promove y engrandece nos cultura".

PADU, UN REPASO DI SU BIDA

Juan Chabaya Lampe, miho conoci como "Padú del Caribe" a nace na Aruba dia 26 di april 1920. E matrimonio Henry Lampe (†) y Ida Lampe-Croes (†) a ser bendiciona cu tres yiu di cual Padú ta e di dos.

Padú ta gradici su number Juan Chabaya Lampe na su padushi. Como cu su abuelo a fayece poco tempo prome cu Padú a nace, su mayornan a dicidi di dune number di su padushi. Despues su famia a dune ademas e number di cariño "Padú".

Padú a crece den un cas, caminda semper alegria musical tabata reina y den e ambiente aki su interes pa musica a lanta.

Cu 12 aña di edad ya caba Padú tabatin basta agilidad riba clarinet, mandolin y cuarta. A lo largo ta piano a bira su instrumento preferi y na dje el a dedica mayoria parti di su tempo.

Padú a haya su prome lesnan di piano cerca su tata y despues a sigui tuma les di piano cerca Shon Shisi Rodriguez kende tabata e unico instructora di piano.

Henry Lampe, tata di Padú, tambe tabata conoci como un bon pianista y musico. Frecuentemente Henry Lampe tabata reuni cu su rumannan Wem, tocando wiri, Zep, cu fluit y Olivier cu su fió, na cas di nan tata den Nassaustraat. Den e encuentronan aki musica tabata waya

y nan tabata entretene nan mes tocando walsnan di temponan bieu.

Na aña 1946 Padú a casa cu Daisy Croes, kende a fayece dia 15 di november 1994; e matrimonio aki tin solamente un yiu, Vivian.

Padú a ricibi su educacion basico na Juliana School, despues el a sigui estudionan mas avansa na cas mes.

Durante e di Dos Guerra Mundial, Padú a presta servicio militar y apesar cu e mes no tabata sinti mucho amor pa militarismo, el a logra progresa den e poco tempo cu e tabata den dienst. Den menos di un aña Padú a alcanza e rango di "Sargento", pa despues pasa examen pa e rango di "Segundo teniente" cu exito, cua rango e no a eherce pasobra el a prefera di sali for di servicio militar. Padú a traha na varios empresa, entre otro den e negoshi di Jani Eman ("Shiphandler"), despues den "Hardware and building material store" di su omo, Addison W. Croes. Padú a maneha tambe un negoshi di instalacion electrico. Despues di e trabao aki Padú a wordo apunta como empleado den gerencia di ALM, prome como hefe di venta y despues como representante di ALM na Aruba. Cu ALM Padú a traha mas cu 15 aña y na 1980 el a bai cu pension.

Mientras Padú tabata traha pa mantene su famia, el a dedica hopi di su tempo liber na dos ramo artistico esta musica y pintamento.

Di e dos ramonan aki Padú a desaroya musica mas. Aunque Padú ta gusta pinta, su trabao no a permitie hinca e tempo cu e tabata desea den pintamento.

Su unico yiu muhe, Vivian, despues di a caba su MULO

na Aruba, a sigui su estudio den exterior y actualmente ta encarga cu Banco di Sanger na Hospital dr. Horacio Oduber.

NOS HIMNO "ARUBA DUSHI TERA"

Na aña 1951, Rufo Wever y Padú Lampe a sinti e necesidad pa cuminsa conserva y promove tur loke nan ta considera como ritmo y melodia tipico di Aruba. Inspira pa tal idea, hunto nan a cuminsa cu grabacion y produccion di disconan di 78 RPM (Rotation Per Minute) y lansa nan riba mercado di Antiyanan Hulandes. Tur disco tabata composicionnan original di Rufo Wever y Padú Lampe mes. Algun pieza nan a compone hunto, y otro pieza tabata di diferente compositor Arubiano di antes. Tambe nan tabata graba musica perteneciente na folklore di Aruba. Di e forma aki nan a haci un contribucion sumamente valioso na conserva y propaga nos ritmonan mas gusta, entre otro wals y tumba, cu awe ta sigui resona cu alegria den oido di nos pueblo.

Un mainta na aña 1952, e fecha exacto no ta conoci, Padú a yega cerca Rufo, cu e idea pa nan compone un pieza cu lo mester expresa e amor y lanta e sentimento patriotico di nos pueblo pa Aruba. A surgi e pregunta si mester traha e pieza den ritmo di marcha, ya cu e ta pa crea amor y despierta sintimentonan patriotico pa Aruba, of den ritmo di Wals, cu ta un ritmo tipico di nos

folklore musical. E solucion tabata facil: a crea un melodia cu facilmente por a interpreta den ritmo di marcha y den ritmo di wals. E mes un dia ey e pieza a keda cla. "Aruba Dushi Tera" a nace, completo cu letra y musica. E tempo ey e pieza tabata consisti di dos couplet y e refran.

Pa motibonan tecnico fuera di alcance di e compositornan, nan no por a graba "Aruba Dushi Tera", ni lanse riba mercado manera nan tabata custumbra di haci cu nan otro piezanan.

Na 1954 Radio Kelkboom a graba e pieza aki riba disco 78, cu canto di "De Trupialen" bao direccion di Frère Alexius. Padú mes a toca piano pa grabacion di e disco aki.

Den mes un aña dos di nos radio-emisoranan a transmiti "Aruba Dushi Tera" den ritmo di marcha tambe. E compositornan a haya e impresion cu den ritmo di wals e pieza ta cay mucho mas na smaak.

Na 1976 un couplet mas a wordo añadi na e himno, cu ta elogia e cordialidad di e pueblo di Aruba y su amor pa libertad.

Dia 16 di maart 1976 Parlamento di Aruba a aproba "Aruba Dushi Tera" como himno oficial di Aruba.

Dia 18 di maart 1976, durante un acto oficial memorabel organiza pa Gobierno insular di Aruba, a tuma luga den Wilhelmina Stadion proclamacion oficial di nos Himno "Aruba Dushi Tera".

ARUBA DUSHI TERA

*ARUBA PATRIA APRECIA
NOS CUNA VENERA
CHIKITO Y SIMPEL BO POR TA
PERO SI RESPETA*

CORO:

*O, ARUBA, DUSHI TERA
NOS BARANCA TAN STIMA
NOS AMOR P'ABO T'ASINA GRANDI
CU N' TIN NADA PA KIBR'E! (BIS)*

*BO PLAYANAN TAN ADMIRA
CU PALMA TUR DORNA
BO ESCUDO Y BANDERA TA
ORGUYO DI NOS TUR*

- CORO -

*GRANDEZA DI BO PUEBLO TA
SU GRAN CORDIALIDAD
CU DIOS POR GUIA Y CONSERVA
SU AMOR PA LIBERTAD*

- CORO -

DE TRUPIALEN

Semper Padu a coopera cu e agrupacion hubenil "De Trupialen", cu a bira hopi popular bao direccion di Frère Alexius. De Trupialen a lanta na aña 1953 y te ainda e grupo aki ta activo.

Segun cu Hubert (Lio) Booi tabata skirbi letra pa cancionnan pa "De Trupialen". Padu tabata pone nan riba musica.

Tres cantica di mucha cu te ainda ta hopi gusta ta:

- *Chanita*
- *Peruchi*
- *Fiesta den Cura.*

PADU, E COMPOSITOR

Padú a compone pieza pa diferente ocasion, entre otro:

- Pa dia di mama:
Pa Ma
- Pa dia di tata:
Pa papai
- Na ocasion di Pasco:
Un Pasco mas

- Na ocasion di e prome Pasco cu Padú a pasa sin su yiu:

Nostalgia Navideño

- Na ocasion di Aña Nobo:

E bieu a laga cai

- Na ocasion di Carnaval:

Carnaval

- Dedic na su nieto Erwin Huascar Anaya:

Sonrisa di un baby

- Dedic na su nieta Carmen Sonia:

Carmen Sonia

- Dedic na su Señora:

Daisy

- Dedic na su yiu:

Vivian

- Na ocasion di fayecimento di e musico Curasoleño Rudolf Th. Palm:

11 september 1950

Carnaval ta e prome calypso na Papiamento. Padú y Rufo a compone na ocasion di Carnaval di Tivoli na 1955.

Por bisa cu "*Abo So*", cu Padú a compone a bira un pieza clasico internacional. Padú a skirbie na Papiamento y Hubert (Lio) Booi a traducie na Ingles y Spaño.

Tambe Padú a skirbi letra, graba y imortaliza e wals "*Despedida*" cu e y su amigo dr. Rudy Chan a compone. E Orquesta Filarmonico di Surnam tambe a yega di interpreta e pieza aki, durante nan actuacion den Cas di Cultura.

Padú a skirbi "*Sonrisa di un baby*" den tres idioma, Papiamento, Ingles y Spaño. E composicion aki e ta considera un di e mas bunitanan di su coleccion.

SONRISA DI UN BABY

*Sonrisa di un baby
mi a ripara
tin un dulzura ta iradia
un mistico encanto
un tierno inocencia di adora
cu semper ta yena
cu alegria un curazon
cu hasta por calma
un tristeza of un dolor...*

*Sonrisa di un baby
mi a descubri
ta algo dushi di berdad
tesoro mas grandi
cu por tin den un hogar
dichoso ta e alma
cu e suerte pa mira
tur dia un sonrisa
di un baby stima!*

-

Otro composicionnan di Padú cu ta gosa di gran popularidad ta:

- *Foi' dia m'a mirabo,*
- *Ayera,*
- *Solo el amor,*
- *Kibrahacha,*
- *Mi no sa ta pakico,*
- *Mi n' sa,*
- *Esaki ta e tumba.*

Padú no ta un musico di profesion, sin embargo tur loke el a produci riba e tereno aki, a haya gran admiracion den pueblo.

Aki ta sigui un bista di Padú su composicionnan, reparti segun melodia di wals, tumba, bolero, danza, merengue y mambo.

WALS

- | | |
|---------------------|-------------------------|
| - 11 september 1950 | - Suavidad |
| - Daisy | - En tu cumpleaños |
| - Noche en Curaçao | - Aruba romantico |
| - Ensoñación | - Ilusion |
| - Inspiracion | - El libertador |
| - Vivian | - 10 aniversario di ALM |
| - Leve Nederland | - Biba dushi |
| - Soledad | - Pa ma |
| - Esmeralda | - Flor di cadushi |
| - Abo so | - Aruba Dushi Tera |

- Metralla
- Saludo a Maracaibo
- Weekend in Bonaire

TUMBA

- Den temp'i guera 'ki
- Ballena
- Charada
- Dobla Skina
- E bieu a laga cai
- Tocadó
- Para want'e
- El héroe
- El gato negro
- Boca di tribon
- Na mi un chens
- Pariba di cas
- Esta dushi
- Fiesta den curá
- Piu piu piu
- Ban cu ALM

BOLERO

- El ciego
- Miss Antillas
- Melodia di Amor
- Cantando
- Tus ojos
- Estoy enamorado
- Tus labios
- Nostalgia Navideño
- Mía serás
- Aquella noche
- Recuerdo
- Ayera
- A tí
- Foi' dia m'a mirabo
- Era una linda noche
- Un pasco mas
- Amor en vano
- Una locura
- Pensar en tí
- Sonrisa di un baby

DANZA

- A Puerto Rico
- Chanita

MERENGUE

- Candela
- Merengue Antiyano

MAMBO

- Mambo Antiyano

- Mambo Arubano

Padú a compone e musica pa e poema di Hubert Booi titulá "*Nochi di Pasco*", skirbi na 1971, un pieza hopi scucha den temporada di Pascu di Nacemento. Lidwina Booi a canta e pieza aki pa prome biaha.

PADU, E MUSICO

Padu a graba hopi di su composicionnan, prome riba disconan 78 RPM y despues riba Longplay y Compact Disc.

DISCO 78 RPM

Durante e di Dos Guera Mundial, Padú tabata e prome persona cu a produci y graba dos disco 78 RPM cu cuatro composicion propio; dos di nan a bira hopi popular e tempo ey. Nan ta e tumbanan "*Den temp'i guera 'ki*" y "*Aruba dushi*".

Na aña 1947 e compania diskero "R.C.A. Victor" di Merca a acepta y a lansa riba mercado tres disco 78, cu composicionnan di Padú canta pa Charles Croes. Tabata trata di e boleronan "*Mi lamento*" y "*Con tu*

amor soñando", y e tumba "*El héroe*".

Den un espíritu di patriotismo, di amistad y cu gran deseo di por haci algo pa asina nos folklore musical no bay perdi, Padú hunto cu su gran amigo Rufo Wever, a produci masha hopi disco 78 na Aruba mes. Nan a graba esakinan riba un "recorder" profesional marca R.C.A., pa despues laga edita esaki na Miami bao di e label di marca "Padú" auspicia pa "Aruba Recording Company", un compania lanta pa Padú y Rufo specialmente pa haci e trabao aki.

A' graba un total di 20 pieza na "Aruba Recording Company", consistiendo di algun composicion di Padú y Rufo mes y piezanan di otro compositornan di nos folklore.

Padú a sigui graba hopi disco 78 riba e seyo "MUSIKA", edita pa e cas musical di Thomas Henriquez(†) na Corsou.

Composicionnan original, tanto letra como musica, cu Padú a graba riba disco cu e label "Padú", y label "MUSIKA" ta:

- Dobla Skina,
- Charada,
- El Ciego,
- Miss Antillas,
- Tocadó,
- Solo el pensar en tí,
- Mía Serás,
- Así cantando,

- Recuerdo,
- E bieu a laga cai,
- Tus ojos,
- Melodía de amor,
- Linda Noche,
- Bulawayando en Puerto Rico,
- A Puerto Rico,
- Ballena,
- Kibrahacha.

Padú a completa textonan di algun cancion di nos folklore musical pa asina graba nan y immortalisa nan. Dos di nan cu a coi reis den nos ambiente musical ta e tumbanan "*Dalia*" y "*Nos a sali paranda*".

LONGPLAY

Padú su prome LP a wordo poni riba plaza pa Alfred Capello di e compania diskero "La Bonanza" na Otrabanda, Corsou. Titulo di e LP aki ta "*Round Trip with Padú del Caribe*". Riba e prome LP aki tin un composicion masha conoci cu ta "*Rosa Angelina*" di Juan Vicente Torrealba. Despues di e LP aki a sigui mas grabacion riba LP.

Su LP "*Padú del Caribe en Venezuela*" graba na 1960 riba e seyo "RCA Victor" di Venezuela, a bende mas cu 50.000 copia. E LP aki a bira un hit pa cua Padú a ricibi e afamado "*Piano de Oro*".

Padú a graba e cantidad di 11 L.P. na Caracas y riba cada LP semper Padú a percura pa graba, no solamente piezanan Venezolano, sino tambe musica di nos folklore y tambe dos ot

tres composicion di dje mes.

Esaki a trece fama pe tanto na Venezuela y Antiyanan Hulandes, como tambe na Hulanda.

Padú a dedica un LP completamente na su gran amigo y colega musical Rufo Wever, cu 12 composicion original di Rufo. E LP ta titula "*Recordando a Rufo Wever*", un disco cu semper lo sigui tene e gran artista Arubano aki bibo den nos memoria.

COMPACT DISC

Dia 8 di juni 1993 a tuma luga bautismo di e prome CD di Padú del Caribe na Costa Linda Beach Resort, titula "*Recuerdonan Stimá*", cu a wordo traha, specialmente pa e hubentud Arubano por sera conoci cu Padú y aprecia su musica. E Compact Disc aki ta contene e 20 hitnan mas grandi di Padú, y e ta graba riba e seyo "Zona Bon Records".

Despues di a cosecha exito cu su prome CD, Padú a graba su CD "*Cu Amor y Cariño*" na "Aruba Recording Studio", cu Antonio Lacle como ingeniero y Johnny Croes estudiante na "Berkley College of Music". E CD aki tin 15 pieza original, di cua mayoria ta composicionnan completamente nobo of cu nunca ainda a yega di sali riba disco. E CD ta combina varios ritmo tradicional Arubiano y Caribense, manera tumba, wals, mazurka, mambo, merengue, danza y bolero. Esaki ta Padú su prome grabacion den casi 20 aña cu composicionnan cu nunca a wordo treci riba mercado. Dia 27 di oktober 1994 a batisa e di dos CD aki den "Desires" Nightclub na Sonesta Hotel. Padú a dedica "*Cu Amor y Cariño*" na e pueblo di Aruba y Antiya cu semper a apoye. Riba e CD aki Padú a

graba tambe un wals "*Biblioteca Nacional*" dedica na nos biblioteca. Padú a compone e cancion aki un poco tempo prome cu e "Luna Cultural" cu Biblioteca a organisa na aña 1983. Padú a estrena e cancion aki riba fecha di inauguracion di e "Luna Cultural" (1 september 1983), dedica na su persona. Prome cu e inauguracion, Padú a desvela e borchí cu nomber di e caya yama "CAYA RUFO WEVER", pabou di Biblioteca Nacional.

Actualmente Padú ta preparando e grabacion di su di tres disco compacto.

PRESENTACION NA TELEVISION

Cu frecuencia Padú a yega di actua den programanan di television Venezolano, entre otro den e shownan popular manera di Victor Saume (†), Renny Ottolina (†), Henry Altuve y Alfredo Ledezma. Tambe Padú a actua diferente biaha dilanti camara di television di Gobierno Venezolano y dos biaha den e programa Sabado Sencacional di Amador Bendayan (†).

Padú tabata e prome persona cu a cuminsa cu presentacion di nos talentonan local na Television Arubano na aña 1963. Varios di nos artistanan, famoso awendia, a debuta y a actua cu frecuencia den "Padú del Caribe y su show". Padú tabata presenta e programa aki un biaha pa siman na Tele Aruba, bao auspicio di Esso y pa un periodo di tres aña. Artistanan conoci cu a actua den su

programa na television ta Dhaddy Brokke, Jossy Brokke y Nilka Franca.

Padú a yega di presenta na television y pa publico na diferente pais: entre otro Corsou, Bonaire, Venezuela, Colombia, Puerto Rico, Republica Dominicana, Jamaica, Cuba, Merca (Miami, New York, Seattle) y Hulanda.

PADU, E PINTOR

Riba tereno di arte di pintura tambe Padú a demostra su destreza. Durante su huentud Padú a pinta un cantidad grandi di cuadro den su propio estilo. Mescos cu ta e caso cu musica, tambe den pintamento Padú ta completamente auto-didactico.

Padú ta prefera pinta naturalesa, diferente cuadro di paisahe ta expresa esaki. Su cuadranan ta numeroso. Padú a regala hopi cuadro na amigonan y otro el a bende. Padú a yega di participa na varios concurso di arte di pintura riba nivel internacional.

- Na aña 1939 Padú su cuadro *"Typical view of Aruba"*, exhibi den un exposicion internacional na "World's Fair" na New York, a gana un medaya di brons cu inscripcion riba dje cu ta bisa: "For a contribution to the art of the world".

- Na aña 1954 su cuadro *"Fruitmarket at the seaside"* a gana e prome premio regional den un exposicion di arte

Caribense, teni na New York, bao auspicio di Alcoa Steamship Company.

Exposicion di cuadra na Aruba a tuma luga na:

- Aruba Caribbean Hotel, riba iniciativa di Wichi De Palm di De Palm Tours, cu a patrosina un exposicion di 20 obra di Padú den lobby di e hotel ey. E exposicion a haya bon comentario, tanto di bishitante local, como tambe di turista.

- Biblioteca Nacional Aruba, durante e "Luna Cultural" di 1983 cu a ser dedica na Padú, unda Biblioteca hunto cu Vivian, su yiu, a expone obranan di Padú. Esaki tabata un sorpresa pa Padú cu despues di 25 aña a bolbe mira un exposicion di su cuadranan.

- Cas di Cultura, na unda den luna di december 1983 a tuma luga un otro exposicion di 52 obra di pintura di Padú, auspacia pa CAVA (Comision di Amistad Venezolano-Arubano).

PADU, E ESCRITOR

Padú, inspira pa su interes den parasicologia y fenomenon sobrenatural a skirbi tres buki riba e topiconan aki.

Su prome buki ta na Ingles y ta titula "The 3rd Element", publica na 1960.

Su di dos buki tambe ta na Ingles y ta titula "Harmonio-

logy: the Art and Science of Living in Harmony with the Universal Laws", publica na 1976. Den un carta personal dirigi na Padú, e famoso teologo y escritor Dr. Norman Vincent Peale, a bisa tocante e buki aki: *"I want you to know how greatly I have enjoyed and profited from your splendid book Harmoniology"*.

Su di tres buki, skirbi na Papiamento y titula "Ciencia acercando e mundo espiritual?", a wordo publica na 1986 pa Imprenta Nacional Arubano, cu yudanza financiero di Prins Bernhard Fonds Nederlandse Antillen. Esaki ta e prome buki cu ta trata e tema di metafisica den nos idioma Papiamento.

Tur e tres bukinan di Padú ta trata e tema metafisica.

Como estudiante di metafisica y filosofia, Padú a lesa hopi riba e topiconan aki. Di ey pues Padú su interes pa arte y ciencia di hipnotismo, algo cu Padú a studia y practica cu hopi dedicacion den su tempo liber.

Na aña 1964 Padú a pasa su examen na "Society to Advanced Ethical Hypnosis", New Jersey, unda el a ricibi su certificado como "hypnotechnician". E titulo aki segun ley na algun estado na Merca, ta autorisa e poseedor pa practica hipnotismo den casonan manera entre otro, kibra vicio di humamento y uso di alcohol of droga, mengua apetit of baha peso, kita compleho di inferioridad, yuda alumno cu dificultad pa concentra, pa e haya interes pa siña miho na skol y siña un persona con pa relaha fisicamente y mentalmente.

Sin embargo e "hypnotechnician" por trata casonan netamente medico tambe, basta cu un medico keda oficialmente responsabel pa e pacient.

Pero Padú su interes den hipnotismo ta unicamente basa riba su interes den parasicologia, ya cu diferente fenomeno di naturalesa psiquico por manifesta nan mes den un persona den estado di hipnosis.

PADU, E EMBAHADOR CULTURAL

Den transcurso di añanan Padú a duna su aporte riba tereno cultural, tanto na Antiyanan Hulandes, como tambe na Hulanda y en especial, na Aruba.

Na aña 1955 durante bishita di Su Mahestad Reina Juliana, Padú cu su musica a inspira Nos Mahestad pa baila riba tononan di e wals "Arubanita" composicion di Rufo Wever.

Cu su musica Padú a hiba nos cultura pafo di Aruba y a haci nos isla conoci na diferente pais. Cu carisma personal y voluntariamente Padú tabata duna su cooperacion tambe pa promove nos turismo den exterior. Hopi biaha den pasado, riba invitacion di "Aruba Toeristen Bureau" y tambe di "Antilliaanse Luchtvaart Maatschappij" (ALM), Padú a forma parti di delegacionnan cu a sali pa exterior pa promove nos cultura y turismo.

RECONOCIMIENTO

Padú a ricibi diferente plakaat y diploma di reconocimiento for di Gobierno di Aruba. Diferente otro gremio, tanto di Aruba, como tambe di Corsou, Venezuela y Hulanda a duna reconocimiento na Padú.

ARUBA:

Na su regreso na Aruba na año 1961, despues di a cosecha exito cu su LP "Padú del Caribe en Venezuela", Padú a haya un sorpresa, ora cu na su yegada na aeropuerto, Gezaghebber di Aruba, Freddy Beaujon (†) encabesando un comision di recepcion consistiendo di representantenan di gobierno y di otro gremio di Aruba, a bin ricibie. Un publico grandi a acudi pa dune un homenahe espontaneo, un acto cu Padú semper a keda corda cu hopi cariño, aprecio y gratitud.

Pa su esfuerzonan den ramo artistico Padú a ricibi diferente premio; entre otro di:

- "Kiwanis Club of Aruba" na año 1966: "Award For Distinguished Services Rendered to the Community of Aruba".
- "Rotary Club" di Aruba, na mei 1991, cu un distincion halto di "Paul Harris Fellow". Esaki ta un premio cu Rotary ta otorga na personanan den nan mes un seno of na personanan den comunidad, kendenan a destaca. Esey a sosode den Cas di Cultura na unda Rotary Club a brinda Padú un homenahe durante un show cultural. Na e ocasion aki un grupo di nos miho artistanan local a interpreta composicionnan di Padú, pa un sala yen. Un publico hopi entusiasma a duna e artistanan un ovacion para pa basta rato.

Otro homenahenan y premionan cu Padú a ricibi ta di:

- E popular cantante Dhaddy Brokke na año 1991, kende a presenta un homenahe na Padú del Caribe, den Golden Tulip Hotel. Na e ocasion aki a batisa e LP, y CASSETTE riba cua Dhaddy a canta pa Padú dies composicion original di Padú mes.

- Tony van Veen, representante di "Zona Bon Records" y productor di e CD "Recuerdonan Stimá", dia 8 di juni 1993 durante bautismo di Padú su prome CD "Recuerdonan Stimá", a haci entrega di un plakaat na Padú. E plakaat special aki Padú a ricibi como un aprecio pa tur e trabaonan di gran balor cu el a realisa pa nos cultura. Riba e plakaat aki tin un CD y un cassette di oro.

- Radio Galactica "Top 20 Awards" y tambe "Den Ambiente Awards" cu a premia e CD titula "Recuerdonan Stima" cu e premio di "CD mas bendi di año" cua mesora a bira un hit.

- Radio Galactica "Top 20 Awards", cu a premia e CD "Cu amor y Cariño" como e CD di "Reconocemento Musical di Año". E mesun CD aki a haya e premio di "Den Ambiente Awards", como e "CD Cultural di año", basa riba votacion popular di parti di e oyentenan.

HULANDA:

- Na año 1972 Padú a ricibi di Su Mahestad Reina Juliana e condecoracion di "Ridder in de Orde van Oranje Nassau" pa su trabao valioso riba tereno cultural Arubano, Antiyano y Hulandes.

- Na año 1986 Padú a ricibi di Su Alteza Real Prins Bernhard e honor mas halto riba tereno cultural Hulandes, e asina yama "Zilveren Anjer".

VENEZUELA:

- Na aña 1960 Padú a ricibi e premio "Piano de Oro" pa su LP "Padú del Caribe en Venezuela".
- Na aña 1975 Gobierno Venezolano a condecora Padú cu e Orden di Andres Bello Segunda clase.

BIBLIOGRAFIA

BIBLIOGRAFIA DI BUKI DI PADÚ

Ciencia acercando e mundo espiritual? / Padú Lampe ; introd. Hubert Booi ; prol. S.E. Eman ; pref. - Imprenta Nacional Arubano, 1986 . - 100p. ; 20 cm.

Harmoniology : the art and science of living in harmony with the universal laws : a practical guidebook providing the key to peace, health, and happiness / Padú Lampe ; forew. H.P.A. van Schouwen ; pref. - Philadelphia: Dorrance , 1976. - IX, 51 p. ; 22 cm.

ISBN 0-8059-2289-X

The 3rd element : a revolutionary hypothesis propounding the existence of a supernormal form of vibration, serving as a link between and interpenetrating the two worlds, while playing a fundamental role in all processes and manifestations in nature / by Padú Lampe. - New York : Carlton Press, 1960. - 79p. - ; 21 cm.

BIBLIOGRAFIA SELECTIVO DI PUBLICACIONNAN RIBA PADÚ

- Aruba Rotary Club cu concierto di homenahe pa Padú Lampe
Den: Diario, 17 di mei (1991)
- Brochure Carnaval Aruba Tivoli Club 1956;
Den: Afdeling Arubiana, Biblioteca Nacional Aruba

- Buki Ciencia acercando e mundo espiritual? Den circulacion
Den: La Prensa, 17 di juni (1987)
- Collectie Ito Tromp
Den: Afdeling Arubiana, Biblioteca Nacional Aruba
- Den ambiente awards tabata un exito rotundo
Den: Diario, 24 di december (1992)
- Dhaddy Brokke cu LP: Homenage na Padú del Caribe
Den: Diario, 13 di april (1991)
- Documentatiemap Padú Lampe
Den: Afdeling Arubiana, Biblioteca Nacional Aruba
- Dos gran musico autor di nos himno nacional cu no por ser
lubida
Den: Diario, 18 di maart (1993)
- Encyclopedie van de Nederlandse Antillen / onder red van
J. Ph. de Palm, 1985 ; p. 233-234
- Hopi interes pa e CD di Padú del Caribe
Den: Diario, 12 di juni (1993)
- Muy pronto bautismo di e CD nobo di Padú del Caribe
Den: Diario, 1 di oktober (1994)
- Muziek en musici van de Nederlandse Antillen / Edgar
Palm. - Curaçao : De Curaçaosche Courant, 1978; p.205-
209
- Nos simbolonan di union y identidad / publicacion di
Servicio Informativo di Gobierno Insular Aruba. - maart
1977 ; p. 10 - 11
- Padú a drenta studio: despues di 15 año
Den: Diario, 15 di oktober (1994)
- Padú del Caribe: Humanitario di nos mundo musical
Den: Brindis; januari (1975)
- Padú del Caribe cu recuerdonan stima di dje y di nos
Den: Diario, 9 di juni (1993)
- Padú del Caribe ta lansa C.D. nobo riba mercado

- Den: La Prensa, 27 di oktober (1994)
- Padú Lampe : "Mester reconstrui nos folklore...!"
Den: La Prensa, 15 di maart (1969)
 - Padú's eerste CD
Den: Amigoe, 10 di juni (1993)
 - Zilveren anjer slaat terug op Anjerdag '40
Den: Amigoe, 20 di juni (1986)



